

Qilalukkanik qaqortanik qernertanillu illersuineq piniarnerlu pillugit Namminersorlutik Oqartussat nalunaarutaat nr. 7, 29. marts 2011-meersumi § 11, Imm. 2-p atorunnaarsinneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Kristian Jeremiassen, Siumut)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Siullermeerlugu suliarineqarnera

Inatsisartunut ilaasortap Kristian Jeremiassen-ip aalajangiiffigisassatut siunnersuutimini allappoq, inuussutissarsiutigalugu piniartunut aamma sunngiffimmi piniartartunut qilalukkanik qernertanik qaqortanillu qanoq amerlatigisunik pisassiissanerlutik kommunit nammineerlutik aalajangiiffigisinnaasariaqaraat. Inatsisartunut ilaasortaq Kristian Jeremiassen isumaqarpoq, paragraf 11, imm. 2, imatut nassuiaatitaqartoq, aqutsiveqarfimmi pisassiissutinit 0 % aamma 10%-it akornanni sunngiffimmi piniartartut pisassinneqarsinnaanerit, kommunit nammineerlutik piginnaatitaanerannut killiliisuusoq. Kiisalu Inatsisartunut ilaasortaq Kristian Jeremiassen isumaqarpoq, qilalukkanik qaqortanik qernertanillu pisassiissutinit siunertarineqartuaannarsimasoq, qitiusumiit pisassiissutit amerlanersaat inuussutissarsiutigalugu piniartunut tunniunneqartarnissaat.

Piniarsinnaatitaasunut pisassiissutinik agguaassisarneq pillugu aalajangersakkani allannguut eqqartorneqartoq, inunnut sunngiffimmi piniarsinnaanermut allagartalinnut aqutsiveqarfimmi pisassiissutinit taamaallaat 0 % aamma 10 %-it akornanni kommunit pisassiisnaanerit, arferit kigutillit taakku marluusut pillugit nalunaarutip 2004-meersup 2010-2011-mi allanngortiterneqarnerata ilagivaa. Aallaqqaataanit tusarniaanermut missingiut suli aamma allannguuteqarpoq, taanna erseqqissaateqarpoq, inuit inuussutissarsiutigalugu piniarnermut allagartallit kisimik qaqortanik qernertanillu qilalugarniarnissamat akuersissuteqarfigineqassasut.

KNAPK siusinnerusukkut allakkatigut tunngavilersuuteqarnikuuvoq, isumalluutitut aalajangersimasumik pisassiinikkut killilersuinermit inuussutissarsiutigalugu piniartut salliutinneqartariaqartut. Taamaattumik nalunaarummi § 11, imm. 2-mi inuussutissarsiortut piumasaqaataat naaperiarneqarsimavoq.

Piniaqatigiittarneq pillugu kommunet oqartussaanerit nalunaarutip § 12-atigut eqqanaarneqarsimavortaaq, tassa kommune kommunemi ileqqoreqqusatigut piniaqatigiittarneq pillugu malittarisassiorsinnaammat.

Inatsisitigut piumasaqaataavoq immikkut nalunaaruteqartussaanermit immersuiffissakkut qilalukkamik qaqortamik qernertamilluunniit pisaqarnerup nalunaarutigineqarnissaa, ukiumi kingullerni marlunni inuussutissarsiutigalugu piniartunit sunngiffimmilu piniartunit qilalukkat pisat nalunaarutigineqartut amerlassusaat erseqqissaaffigineqarsinnaapput. Taamaattorli piniartut allat qasseriartutik peqataasimanersut naliliiffigissallugu periarfissaqanngilaq. Aamma pisanut ataasiakkaanut tunngatillugu piniarnermut allagartat suussusiisa agguataarsimanerisa amerlassusaat nalilersuiffiginissaannut periarfissaqanngilaq.

Paasissutissat takutippaat, nuna tamakkerlugu pisassiissutaasunit ukiuni marlunni kingullerni sunngiffimmi piniartunit qilalukkanut taakkununga tunngatillugu procentit marluk ataallugu nalunaarutigineqarsimasut.

Allannguinnermut atatillugu, ilimagineqarpoq inunnut inuussutissarsiutigalugu piniarnermik allagartalinnut aningaasaqarniarnikkut ajunngitsup tungaanut kinguneqassasoq, mattammik, orsumik, neqimik aamma tuugaamik tunisinikkut isertitassaat amerlanerulersinnaammata, pisiniarfiit saniatigut kisimik nioqqutissanik / inuussutissanik pilersuisunngornermikkut.

Aammattaaq ilimagineqarpoq innuttaasut ilaannut, sunngiffimmi piniarnermut allagartalinnut siusinnerusukkullu arfernik taakkuninnga nammineerlutik pisaqarsinnaasimasunut, allanngortitsineq aningaasaqarnikkut pitsaanngitsumik kinguneqassasoq. Isertitatigut annaasaqaataassanngilaq, piniarnermut allagartaq tuniniaanissamut akuersissutitaqanngimmat, kisiannili namminerisamik aningaasaqarneranni taamaalillunilu aamma namminerisamik aningaasartuuteqarnerulernikkut. Inuussutissat piniakkamik allamik taarserneqartariaqassapput, imaluunniit ileqquusumik nerisassat ilai ilaqutariit ataasiakkaat attatiinnassappatigut pisiarineqartariaqassapput. Tassunga atatillugu, massakkut tuniniaanermi akinut qaffasissunut ilaqutariit ataasiakkaat aningaasaqarnikkut pisinnaassusiat apeqqaataassaaq. Taamaattumik ileqquusumik nerisassanut akit pillugit KNAPK-mik oqaloqatiginninnissaq pisariaqassaaq. Mattaat neqillu ilaat tunitsivinnut akuerisaasunut toqqaannartumik tunineqartarput, imaluunniit illoqarfinni anginerni namminersortunut nioqqutissatut akinut qaffasinnerusunut tunineqartarlutik, tamanna pillugu nerisassamik taassuminnga najukkani pissarsisinnaaneq pisisinnaanerlu annermik avannarpassinnerusumi annikillissaaq imaluunniit aningaasartuutaanerulissalluni.

Apeqqut, Naalakkersuisunit nalilerneqartoq tassaavoq, inuussutissarsiutigalugu sunngiffim-milu piniartunut siunissami pisassiisoqartassanersoq? Isumaqarpugut taamaattariaqartoq, aamma isumaqarpugut, aalajangiineq taanna najukkaniittariaqartoq. Nungusaataanngitsumillu pisassiissutit inassutigineqartut iluanni pisassasoq isumaqarpugut. Piniarnermut allagartanut immikkoortunut marluusunut, aalisartut piniartullu najukkani peqatigiiffiit tusarniaaneq aallaavigalugu, kommunit april 2011-miilli pisassiissutinik agguassinissamut pisinnaatitaasimapput. Aqutsiveqarfinni 16-iusuni ataasiinnarlunniit pisassiissutit 10 %-iilik sunngiffimmi piniartunut tunniussisinnaanermut pisinnaatitaaneq allaanerusumik atornerqarsimaneranik Aalisarnermut, Piniarnermut Nunalerinermullu Naalakkersuisoqarfik paasitinneqarsimanngilaq.

Qulaani taaneqartut tunngavigalugit siunnersuut Naalakkersuisut inassutigissavaat aaliangiiffigisassatut siunnersuut ilalerneqassanngitsoq, aaliangiiffigisassatullu siunnersuutip itigartitsissutigineqarnissaa inassutigalugu.